



Annalisa Giger, la vicepresidente da Gastro Grischun.



Intgantà tuts cun sia magia: il striuni Lionel.



Da la partida a la radunanza è er stà Martin Vincenz, il director da Grischun Vacanzas.



L'antierius cusseglier nazional Dumeni Columberg (a san.) cun Casimir Platzer, il president da Gastro Suisse.



Er stà a Curvalda è Michael Pfäffi (a dretga), il president dal cussegl grond.



Fluregn Fravi e Georgette Dedual han prendi cumià dals ustiers grischuns.

FOTOS G. N. STGIER

«Gastronomes è multitalents»

Gastro Grischun: Radunanza 2017

DA GION NUTEGN STGIER / ANR

■ Per Franz Sepp Caluori, il president da l'uniun tetgala dals ustiers grischuns, è ina meglra savida cunzunda la lescha da victualias indispensabla per tut las persunas che surpiglian da nov in manaschi. El na pretenda dentant betg l'introducziun dal curs per ustiers, il curs obligatoric per gastronomes ch'è vegnì dismiss en noss chantun il 1997. Ina giada dapli è la radunanza annuala da Gastro Grischun stada ina occurrenza nua che la prominenza da la gastronomia, da la politica, da l'economia e dal turissem è s'inscuntrada. Gi lieu ha la radunanza a Curvalda e beneventada è la raspada er vegnida da Margrith Raschein, la presidenta communal da la vischnanca Curvalda.

56 novs cuschiniers

En ses rapport annual ha Franz Sepp Caluori, il president dals 1000 ustiers grischuns, ditg che las accziuns da promover las professiuns da la gastronomia sajan stadas l'onn passà in grond success. Tuttina manca a la branscha anc adina personal qualifitgà, ha el ditg. Tuttina saja bain bel ch'il davos onn hajan 56 cuschiniers terminà cun success lur emprendisadi en noss chantun. Caluori ha er drizzà plets d'ingraziament a la politica, cunzunt a cusseglier Heinz Brand, el che s'engascha a Berna ferm per ina reducziun da la taglia sin plivalur.

Almain enconuschientschas minimalas

Franz Sepp Caluori è betg mo ustier, mabain er deputà. Avant in onn aveva el inoltrà in postulat a la regenza per introducir da nov il curs d'ustiers. Avant 20 onns ha il chantun dismiss il curs obligatoric da trais mais per tut las persunas che surpigliavan da nov in manaschi gastronomic. Dapi la dismissa da quel ha la gastronomia grischuna per part pers a qualitad ed er a quantitad. Il parlament chantunal ha dentant refusà quel postulat. Ussa vul Caluori inoltrar vers la fin da l'onn in nov postulat. Quai saja però in postulat «light», ha el ditg. El pretenda simplamain dal chantun che quel vegnia ad introducir ina scolaziun per ils novs ustiers per che quels survegnian enconuschientschas minimalas quai che pertutga la lescha da victualias e las ordinaziuns da la higiena. Caluori spera ch'ils collegas deputads e deputadas hajan questa giada chapientscha per sia dumonda. El ha er ditg che gastronomes sajan multitalents cun esser patruns, ospitants, contabilists e schizunt managers che hajan da guardar per ina rendita dal travagl.

Custs da personal da 50%

A Casimir Platzer, il president da Gastro Suisse, fan ils custs dal personal anc adina gronds quitads. Quels sajan oz bunamain en mintga manaschi tar 50% e quai

saja simplamain bler. En China hajan las ustarias custs da personal da 20% e discurren da custs bler memia auts. La concurrenza da la fiera saja e restia vinavant gronda, ha ditg il giast da Kandersteg. Il ferm franc svizzer haja anc adina nauschas consequenzas cun ir ils Svizzers savens sur ils cunfins per mangiar ed ils ustiers per cumprar lur victualias. L'onn passà saja quella summa tuttina stada tar otg milliardas francs.

Las gastronomias da valur centrala

Cusseglier guvernativ Jon Domenic Parolini è cuntent che las pli novas cefras conferman che l'economia (1% dapli) è er sa revegnida in pau en il Grischun. Er las cefras en la hotellaria e gastronomia paran dad esser in pau meglras che avant in onn, dentant in onn cun damain svieuatas e pernottaziuns. Parolini è dentant da buna speranza che l'economia e la gastronomia sajan sin ina meglra via. La gastronomia saja en il turissem ina valur centrala, ha el ditg. A la fin da la radunanza han ils preschents prendi cumià da Fluregn Fravi, el ch'è stà 26 onns mainagestiun da Gastro Grischun, e da Georgette Dedual, ella ch'è stada bler dapli che ina secretaria fidada, mabain la bun'olma da l'uniun dals ustiers grischuns. Dapi l'entschatta 2017 è Marc Tischhauser il nov mainagestiun e Patricia Stuppan la nova secretaria da l'Associaziun grischuna dals ustiers.



El è da nov mainagestiun da Gastro Grischun: Marc Tischhauser.